

M099: Kremsmünsterer Glaube und Beichte

- 221r,16 ich jihe dem almehtigen gote .
 221r,17 unde mîner vrouwen sancte Marîen . unde mînem hêrren [sancte]
 221r,18 Pêtere . unde allen gotes heiligen . unde dir priestere . aller
 221r,19 mîner sünden . die ich ie getete . oder gevrumete . swie ich [si] gevrumete
 .
 221r,20 wizzende oder unwizzende slâfente oder wachente
 221r,21 dankes oder undankes oder swie ich si ie gevrumete . sô ergibe
 221r,22 ich mich hiute schuldic aller mîner sünden . die mennische
 221r,23 gevrûmen mac mit gedanken . mit Worten . mit [werken] .
 221r,24 ich jihe dem almehtigen gote . unde allen sînen heiligen swaz
 221r,25 sô ich ie übeles getete . daz daz mîn schult was . ob ich ie iecht
 221r,26 guotes getete daz daz dîn genâde was . ich gehiez dem almehtigen
 221r,27 gote . mîn garwez herze . mînen offenen willen . mîner
 221r,28 sünden mich ze geloubenne unde alsô verre ze vermîdenne . sô
 221r,29 mich sîn genâde gesterket . unde mîn mennischheit mir verhenget .
 221r,30 ich bite gewegedes unde gedinges mîner vrouwen sanctae Marîen .

 221v,1 mînen hêrren sanctum Petrum . unde alle gotes heiligen . daz si mir
 221v,2 helfente sîn . daz ich sô lange gevristet werde . unze mich mîne
 221v,3 sünde rehte geriuwen . unde ich si rehte gebüeze . ich bite alle die
 221v,4 mich hiute hier hoerente sint . unde sehente . swie sô mich mîn tac
 221v,5 gevriste oder mîn ende . daz si mir des urkünde sîn . an dem
 221v,6 jungesten tage . daz ich hiute hier erschîne in wâren riuwen .
 221v,7 unde in rechter erkantnisse mîner sünden .
 221v,8 ich geloube an den almehtigen got . der der schepfære ist himeles
 221v,9 und der erde . luftes und wazzeres . unde aller der dinge
 221v,10 die dâr inne bevangen sint . ich geloube an den vater . unde
 221v,11 an den sun . unde an den heiligen geist . ich geloube daz die
 221v,12 drî genennede . ein wârer got sint . der dâr ie was âne aneenge .
 221v,13 unde iemer ist âne ende . ich geloube daz der selbe gotessun
 221v,14 geboren wart . von sanctae Marîen einer êwigen megede .
 221v,15 ich geloube daz er hier in werlte was . wârer got wârer mennische
 221v,16 âne sünde . ich geloube daz er gevangen wart . daz er
 221v,17 an daz kriuze gehangen wart . daz er dâr an erstarp . ich
 221v,18 geloube daz er ze der helle vuor . unde dâr ûz lôste die er wolte .
 221v,19 ich geloube daz er des dritten tages erstuont . daz er sît hier
 221v,20 in erde was vierzic tage unde vierzic naht . ich geloube daz
 221v,21 er an dem vierzigstem tage ûf ze himele vuor . daz er dâ

221v,22 sitzet ze sînes vater zesewen . ime ebenhêre unde ebengewaltic .
221v,23 ich geloube daz er her nâch komen sol . ze dem jungesten
221v,24 tage . unde daz ich denne erstên sol . an dem selben lîbe .
221v,25 dâ ich hiute an erschîne . ich geloube daz ich rede geben sol .
221v,26 aller mîner werke . unde daz ich erteilet sol werden . einweder
221v,27 ze dem êwigen lîbe . oder ze dem êwigen tôde . ich geloube
221v,28 die gemeinede der heiligen kristenheit . ich geloube
221v,29 antlâz mîner sünden . ob si mich riuwent . ich geloube den
221v,30 êwigen lîp . âmen .